



Komunikado di prensa 2019-029

Bob Traa durante di almuerzo di VBC:

MAS ATENSHON PA E BANDA DI OFERTA DI EKONOMIA

Willemstad/Philipsburg – Awe presidente interino di Centrale Bank van Curaçao en Sint Maarten (CBCS), dr. Bob Traa, durante e almuerzo di Asosashon di Empresarionan di Kòrsou (Vereniging Bedrijfsleven Curaçao) a stimulá e presentenan ku su diagnòsis di i posibel solushonnan pa e situashon ekonómiko aktual ku Kòrsou ta enfrentá.

Traa a trese dilanti ku produktivitat laboral na Kòrsou ta mustra un tendensia negativo. Na mes momento e kresementu di e forsa laboral potensial ta bahando. Esaki ta trese kuné ku e potensial di kresementu ekonómiko ta negativo. Ora produktivitat laboral baha, empresanan ta redusí e kantidat di kuponan di trabou pa nan baha nan gastunan. Konsekuentemente, desempleo ta oumentá. Kòrsou no solamente konosé un desempleo haltu, pero tampoko ta utilisá kapital optimalmente. Tin hopi edifisio pará bashí i tin sobre-likides den sektor bankario. Ademas e abilidad kompetitivo di Kòrsou ta insufisiente pa motibu di e produktivitat abou i e défisit haltu riba e kuenta koriente di balansa di pago. E struktura di ekonomia di Kòrsou ta skùif poulatinamente di industria pa turismo.

Basá riba e diagnóstiko aki, Traa ta argumentá ku e maneho na Kòrsou mester ta dirigí tantu riba demanda komo oferta di ekonomia. Embista di e défisit grandi riba kuenta koriente di balansa di pago, e ta mira poko espasio pa stimulá e banda di demanda. Ademas, den kaso di maneho fiskal, mester tene kuenta ku e ritmo di ehekushon di medidanan. Un ahuste presupuestario demasiado fuerte den un tempu kòrtiku por redusí aktivitat ekonómiko ainda mas.

E posibilidatnan pa akshonnan riba tereno monetario tambe ta limitá, enbista di e paridat fiho di e florin na dòler merikano. Mas aleu e dinámika ekonómiko di Kòrsou i Sint Maarten ta diferente. E reseshon di Sint Maarten ta di índole konyuntural (forma V) miéntas ku na Kòrsou nos por papia di un reseshon di índole struktural (forma L).

P’esei e énfasis mester ta fortifikashon di e banda di oferta di ekonomia pa asina ei elevá e kresementu potensial na un nivel mas haltu. Kòrsou mester traha riba ehekushon di un agènda di reforma struktural. E reformanan aki mester ta dirigí riba hasi merkado laboral, merkado di produkto i e aparato públiko mas efisiente i produktivo. Énfasis mester ta riba *flexicurity*, ku otro palabra protekshon di hende i no di kuponan di trabou spesífiko. Na momentu di duna

kontenido na e agènda di reforma, tantu gobièrnu, sindikatonan i sektor empresarial mester traha aktivamente huntu na esaki.

Ku su diskurso Traa kier fomentá un diálogo pa yega na un agènda di reforma struktural kargá konhuntamente.

E presentashon di dr. Traa ta disponibel riba e wèpsait di CBCS:
<http://www.centralbank.cw/publications/speeches-presentations>

Willemstad, 21 di ougùstùs 2019

CENTRALE BANK VAN CURACAO EN SINT MAARTEN